



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
19 Agostu 2021

JSMP Audénsia ho PJR
Aprezenta unidade foun Serbisu Apoiu Vítima inklui atividade sira no possibilidade atu kria Nota Entendimentu (MoU) iha futuru

Iha 18 Agostu 2021, Ekipa Judicial System Monitoring Programme-JSMP kompostu husi Diretora Ezekutiva, Koordenadora Peskiza Legál (LRU) no Unidade Treinamentu no Advokasia (UTA) no mós Koordenadór Programa Observasaun Parlamentu (POP), halo audénsia ho Dignísimu Prokuradór Jerál Repúblika (PJR), Dr. Alfonso Lopez, iha Edifísiu Prokuradoria Jerál Repúblika, Dili.

Audénsia ne'e ho objetivu atu introdús estrutura foun JSMP nian no apresenta mós JSMP nia serbisu sira, liuliu unidade foun kona-ba Serbisu Apoiu Vítima ba iha Prokuradór Jerál. Alende ne'e, JSMP hato'o mós hanoin, preokupasaun no rekomendasaun balun liga ho serbisu Ministériu Públiku ni'an. Iha audénsia ne'e mós JSMP no PJR ko'alia kona-ba atu hametin di'ak liután relasaun no kooperasaun serbisu entre Ministériu Públiku ho JSMP ne'ebé durante iha ona ho possibilidade kria Nota Entendimentu (MoU) ida.

Iha apresentasaun, JSMP uluk nana'in agradese ba PJR tanba aseita JSMP ninia pedidu ne'e ho lais, ida ne'e hanesan onra boot ida ba JSMP. Depoisde apresenta estrutura foun JSMP ni'an, JSMP introdús ba PJR kona-ba unidade Serbisu Apoiu Vítima ne'ebé harii hodi fó assisténsia legál ba vítima violénsia bazeia ba jéneru hanesan ba krime sira abuzu seksuál ba menór, violasaun seksuál, kazu volénsia doméstika inklui kazu sivíl ezersísiu podér paternál no alimentasaun ba menór sira.

Preokupasaun sira ne'ebé JSMP hato'o ba PJR mak kona-ba kestaun preskrisaun tempu, medida koasaun, uniformizasaun ba akuzasaun no kestaun kombate korrupsaun.

Kestaun preskrisaun tempu, JSMP foti ezemplu ida kona-ba kazu violasaun seksuál ne'ebé tribunál arkiva tanba depoisde produsaun ba prova no alegasaun finál, tribunál haree katak kazu ne'e liu ona prazu ba preskrisaun. JSMP konsidera situasaun ne'e grave teb-tebes no prejudika vítima tanba vítima tenke lakon nia direitu ba justisa no ida-ne'e impede vítima sira atu buka reparasaun através husi sistema justisa formál.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl
Facebook: www.facebook.com/timorleste.jsmp
Twitter: @JSMPTl

Enkuantu kestaun kona-ba aplikasaun medida koasaun, JSMP foti ezemplu kona-ba kazu arguidu kazu abuzu seksuál ho natureza inestu ne'ebé akontese iha Batugede antes ne'e prokuradór husu atu aplika prizaun preventiva, maibé iha desizaun tribunál nian aplika de'it termu intidade rezidência (TIR), nune'e arguidu kontinua komete tan omisídiu agravadu hasoru nia feen, ne'ebé hanesan mós testemuña iha kazu ne'e.

Kestaun kona-ba uniformizasaun ba iha akuzasaun sira, JSMP foti bazeia ba JSMP ninia monitorizaun iha tribunál sira nota katak iha kazu balun ne'ebé ninia gravidade hanesan, maibé akuzasaun la hanesan no antes ne'e iha JSMP ninia publikasaun sira JSMP sempre rekomenda atu iha mata-dalan ba iha akuzasaun liuliu ba kazu violénsia bazeia ba jéneru.

Kestaun ne'ebé JSMP konsidera importante mós atu ko'alia ho PJR mak kestaun kona-ba kombat korrupsaun. JSMP hanoin katak kombat korrupsaun ne'e nu'udar luta nasional ida ne'ebé parte hothotu iha devér hodi kontribui hodi bele hamenus mezmuke la halokon total tanba korrupsaun ne'e belit ka hamutuk iha ema. Estadu kria ona meu sira ba kombat korrupsaun hanesan harii Komisaun Anti Korrupsaun (KAK) hodi haforsa serbisu Ministériu Públiku (MP) nian no kria ona Lei Medida Prevensaun no Kombat Korrupsaun hodi haforsa serbisu MP no KAK nian.

KAK hanesan liman no ain MP nian, nune'e, JSMP rekomenda atu MP no KAK la bele sai hanesan adversáriu maibé atu bele kompleta no haforsa malu serbisu ba iha kombat korrupsaun nian. Estadu investe orsamentu boot ba instituisaun sira ne'e, bainhira instituisaun sira ne'e la funsiona ho di'ak no laiha valorizasaun serbisu sira instituisaun sira ne'e nian iha parte investigasaun ba kazu korrupsaun sira, partikularmente KAK nian, sei lori prejuizu ba Estadu tanba lakon osan saugate de'it. Nune'e, JSMP husi ba PJR atu bele konsolida relasaun no serbisu hamutuk entre MP no KAK iha luta ba kombat korrupsaun.

Kestaun seluk ne'ebé JSMP apresenta mak kona-ba sasan sira ne'ebé afavor ba Estadu, sasan sira ne'e balun Estadu la utiliza to'o agora no pior liután mak balun nia kondisaun aat ona (valor tun ka valor laiha), nune'e nafatin iha prejuizu.

Alende kestaun sira, JSMP mós ko'alia ho PJR kona-ba publikasaun ba estatística kazu sira MP nian. JSMP husu atu kada fulan bele update kazu ne'ebé mak prokuradór sira atende, nune'e publiku bele hatene kada fulan kazu hira mak prosesu hela no kazu sira mak hetan ona desizaun. Publikasaun ne'e limita de'it ba estatística ka número kazu de'it, sei la inklui nia detallu tanba kestaun segredu justisa.

Antes responde ba hanoin no preokupasaun hirak ne'e, PJR agredese ba JSMP tanba JSMP halo ninia papél ne'ebé importante hodi tau-matan ba setór justisa hodi bele hadi'a liután serbisu sira setór justisa nian.

Hatan ba asuntu kriasaun unidade Serbisu Apoiu Vítima, PJR konsidera nu'udar iniciativa ida ne'ebé di'ak tebes atu bele ajuda vítima sira ne'ebé buka justisa, liuliu ba vítima sira relasiona ho kazu violénsia bazeia ba jéneru hanesan violasaun no abuzu seksuál, nune'e mós ba kazu sira ezersísiu podér paternál. Agora dadaun iha hela diskusaun ba Esbosu Lei Protesaun ba labarik no hein katak iha tempu badak bele aprova no implementa atu bele aseguira protesauun ba labarik sira.

Kestaun preskrisaun tempu, tuir PJR nia hanoin, kestaun ida ne'e MP sei tau iha konsiderasaun hodi hadi'a tanba ida ne'e relasiona aseguira parte sira nia direitu atu hetan justisa. Bainhira preskrisaun tempu liu no arkiva de'it kazu ne'e signífika denegasaun justisa ba parte vítima no arguidu. Bainhira dada tempu naruk ba iha prosesu ne'e, bele fó impaktu ba arguidu kazu arguidu ne'e nia kareira kazu nia figura públiku ruma bainhira ikus mai la provadu katak nia sala ka komete krime.

Enkuantu kestaun aplikasaun medida koasaun, PJR hateten katak prokuradór ka MP nia parte nafatin firme no kontinua husu ba Tribunál atu aplika medida sira koasaun nian apropriadu tuir kazu nia natureza no gravidade. Hanesan kazu ida abuzu seksuál no incestu, MP nia parte husu ba Tribunál atu aplika medida prizaun preventiva, maibé Tribunál rejenta hodi aplika medida TIR no apresentasaun periódika ne'ebé ikus mai arguidu ne'e komete tan krime omisídiu ba nia feen ne'ebé sai hanesan testemuña ba kazu abuzu seksuál ba nia oan.

Kestaun kona-ba uniformizasaun iha akuzasaun ida ne'e, PJR hateten katak sei tau iha konsiderasaun no bainhira atu halo akuzasaun ne'ebé mak di'ak tenke analiza ho kle'an iha kedas investigasaun. Prokuradór mós ko'alia uituan kona-ba kazu TOPU HONIS nian no hato'o katak prokuradór sira nafatin firme iha sira ninia pozisaun hodi reprezenta vítima sira.

Iha parte korrupsaun nian, PJR hateten katak MP no KAK sei la sai hanesan adversáriu no sei buka atu MP ho KAK serbisu hamutuk ho di'ak liután iha serbisu sira investigasaun nian no planu atu halo formasaun hamutuk ba investigadór sira KAK nian ho prokuradór sira. Nune'e, parte rua ne'e bele tuir prosedimentu ne'ebé hanesan ka ida de'it iha investigasaun ba kazu korrupsaun sira. Ikusliu kona-ba kestaun publikasaun, PJR hateten katak kestaun importante no tama ona iha planu estratéjiku MP nian.

Entretantu kona-ba divulgasaun informasaun no serbisu hamutuk entre MP no JSMP iha futuro, PJR hateten katak sei diskute antes kria Nota Entendimentu (MOU) ida entre MP atu bele define serbisu saida mak JSMP bele kontribui.

Atu hetan informasaun kompletu, favór kontaktu

Ana Paula Marçal
Diretora Ezekutiva JSMP
Diresaun e-mail: ana@jsmp.tl

Telephone: (+670) 33238883 | 77040735

Website: <https://jsmp.tl>
info@jsmp.tl